

Pintor hoben Lislaine Bermudez

“Pinta pa mi ta un manera di comprende locual mi ta sinti”



ORANJESTAD- Pinta pa Lislaine Bermudez ta bin mes normal cu hala rosea. Den e edicion aki e ta conta Bon Dia Aruba cu pinta pa su persona ta un manera di comprende locual e ta sinti. Bermudez actualmente tin 23 aña

Bermudez ta conta cu desde chikito semper e tabata gusta pinta masha hopi mes, pero semper e tabata pinta riba papel. Actualmente e tin mas o menos 2 aña y 9 luna ta pinta riba lona. E tin un pagina di Facebook caminda e ta pone su pinturanan asina e ta logra haya clientela. Bermudez ta conta cu mayoria di su clientenan ta hende cu ta haye pa medio di Facebook.

Inspiracion

Bermudez ta conta cu locual ta inspira su persona masha hopi mes ta tur locual cu ta rond di dje. Manera entro otro naturalesa, color, cantica. Cualquier cos cu gara su atencion. Bermudez ta bisa cu e ta un persona cu gusta observa y pensa. Asina su imaginacion por cuminsa draai pa crea un pintura. Tambe tin un persona special den su vida cu ta inspira su



persona. E ta considera e persona ey e motibo pa cual e ta haci locual e ta haci awe.

“E prome pintura cu mi a yega pinta tabata un “ambi-gram” cu mi a gusta masha hopi mes cu mi a “customize” cu hopi detalle y tur cu nan nificacion. Mi a cumpra e cuadra, verf y cuashi y ora

mi a cuminsa pinta cu 0 experiencia den e arte aki, mi a bin realisa cu e cuashinan no tabata adecuado pa mi pintura, mi a sigui full e pintura cu Q-tips.” Bermudez ta comenta.

Talento y actualidad

Segun Bermudez, actualmente e ta haciendo su best pa e haya mas experiencia den mundo di pintura. E ta admiti cu e ta duro ya cu e ta traha tempo completo y e ta studia tambe. “Pero unda tin un deseo, tin un caminda”, Bermudez ta bisa. E semper ta pone tempo a por pinta. Aparte di pinta e ta actuando tambe den un “mini pelicula” cu Semi Chahmi y Carlos Croes. E pelicula yama “The Curious Case of...”

Bermudez ta subraya cu e tin hopi plan y idea pa futuro.

Aruba y arte

Segun Bermudez Aruba tin hopi hende cu talento, cada biah e ta conoce hende nobo y keda babuca cu nan arte. E ta haya cu cada biah e po-

sibilidad pa arte na Aruba ta birando mas grandi. Y Arte ta hayando mas atencion cu añanan anterior, locual segun Bermudez ta hopi bon. Bermudez a finalisa bisando cu pe tur luga ta luga ideal pa pinta basta e tin cuashi y verf. Pero e luga cu mas e gusta pa pinta ta su cas paso eynan e tin un camber special pa e por haci locual e gusta mas, cual ta arte. □

